

L Liet International Festival a Udin

L'important event de musega de la mendranzes vegn metù a jir per la pruma outa te la Tèlia

De gra a l'ARLeF, la Agenzia Regionèla per l Lengaz Furlan e al Comun de Udin, la zità furlèna per na setemèna, dai 17 ai 26 de november del 2011 doventarà l cher de la mendranzes linguistiches d'Europa.

L'event de ponta de la setemèna sarà l Liet International Festival, per la pruma outa te la Tèlia, en program a Udin en sabeda ai 19 de november tel teater Giovanni da Udine.

L Liet International Festival, che l'é stat pissà da la mendranza frisona (Païjes Basc) e l vegn metù a jir vigni an a roda te n lech desferent, l sostegn la musega ti desvalives lengac de mendranza de l'Europa e l premia sorts de musega dalonc da logiches comerzièles o demò folcloristiches.

Chest an en ocajion de la finèla – a chela che tolarà pèrt ence l grop badiot “Contralüm” col toch “La Moncignosa” – l'é stat endrezà na lingia de evenc leé a la musega che pearà via jà en jebia ai 17 con n concert de cianties de mendranza a Gorizia. En vender ai 18 da les 6 da sera te la sala stampa del teater de Udin sarà la prejentazion del liber de Marco Stolfo “La me lenghe e sune il rock” e da Sera n auter concert a Cividat.

L'é na oportunità preziosa per cognoscer e descorig la propostes artistiches neves a nivel european e na ocajion de baratèr esperienzes e renforzèr la rei de contac anter la mendranzes europeènes, ge dajan visibilità a realtèdes che per sòlit resta fora dai greghn ambic de la comunicazion.